

**Napomena:**

„Potvrđivanjem optužnice protiv određene osobe ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.“

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
KANTONALNO TUŽILAŠTVO-TUŽITELJSTVO  
ZENIČKO-DOBOJSKOG KANTONA**

Broj: T04 0 KTK 0017495 14  
Zenica, 25.12.2017. godine

**KANTONALNI SUD U ZENICI**  
-Sudiji za prethodno saslušanje-  
**ZENICA**

Na osnovu člana 45. stav 2. tačka i) u vezi sa članom 241. Zakona o krivičnom postupku F BiH, **p o d i ž e m**

Protiv:

1. **ŽUNIĆ MUGDINA** zv. „Mumo“, iz Zenice,
2. **DILAVER VERNESA**, iz Zenice,
3. **MAGLIĆ ALME**, iz Sarajeva,
4. **ŠEHAGIĆ TAIBA**, iz Kaknja,

Što su,

**I Žunić Mugdin, sam**

U vremenskom periodu od druge polovine 2011. godine do dana 02.01.2014. godine, u Zenici, u svojstvu odgovorne osobe, radeći na poslovima Saradnika za distribuciju i promociju, u Službi za prodaju, Sektora za prodaju i podršku u DD BH Telecom Sarajevo, Direkcija Zenica, u okviru svojih redovnih radnih zadataka i obaveza, u namjeri pribavljanja imovinske koristi za pravno lice „Trafik“ d.o.o. Kakanj, iskorišćavanjem svog službenog ovlaštenja, svjesno postupao protivno odredbama člana 5.3, člana 7.6. alineja 2. i 3., člana 8.6. alineja 1. i 2. Uputstva o distribuciji vrijednosnica i roba posrednicima broj: WIG 7-20/06-02, izdanje 2. od 04.02.2011. godine, te protivno odredbama istih članova, te člana 8.7. alineja 1. i 2. Uputstva o distribuciji vrijednosnica i roba posrednicima broj: WIG 7-20/06-02, izdanje 3. od 01.11.2013. godine, te odredbama člana 131a. Sistematizacije poslova i radnih mjesta u

d.d. BH Telecom Sarajevo, koja je sastavni dio Odluke o izmjenama i dopunama Odluke o Sistematizaciji poslova i radnih mjesta u d.d. „BH Telecom“ Sarajevo broj: 01-1-7-1.-21479-3/13 od 09.09.2013. godine, u vezi sa Odlukom o Sistematizaciji poslova i radnih mjesta u d.d. „BH Telecom“ Sarajevo broj: 01-10-1.-23182/10 od 13.12.2010. godine, tako što je po osnovu zaključenih Ugovora o posredovanju u prodaji vrijednosnica za 2011., 2012. i 2013. godinu, između DD BH Telecom Sarajevo i posrednika „Trafik“ d.o.o. Kakanj,

izdavao distributeru „Trafik“ d.o.o. Kakanj, vrijednosnice BH Telecoma iz magacina C428 Direkcije Zenica, (ULTRA kartice za punjenje/start pakete) u daleko većem iznosu njihove vrijednosti od maksimalno dozvoljenog iznosa visine bankarske garancije istog distributera od 100.000 KM, a sve bez ovjere i potpisa distributera „Trafik“ d.o.o. na izdatnicama za preuzete vrijednosnice, iako je znao da je to suprotno stanju zaliha vrijednosnica koje se nalaze kod posrednika i suprotno posrednikovoj prodaji ranijih zaliha, te znajući da posrednik „Trafik“ d.o.o. nije prethodno izvršio ugovorenu uplatu po osnovu ranijeg zaduženja vrijednosnica,

pa je izdajući vrijednosnice na naprijed navedeni način, kontinuirano prikrivao činjenice o stvarnom zaduženju i dugu distributera Trafik d.o.o. Kakanj, jer je bio svjestan da je u 2012. godini prenesen dug distributera Trafik d.o.o., po osnovu prometa vrijednosnica iz 2011. godine u iznosu od 301.088,00 KM, a u 2013. godini, prenesen dug po osnovu prometa vrijednosnica iz 2012. godine u iznosu od 498.374,40 KM, da bi stanje duga u mjesecu januaru 2013. godine istog posrednika iznosilo 574.744,80 KM, dok je na kraju mjeseca decembra 2013. godine, ukupan dug iznosio 1.385.253, 80 KM,

**da bi potom dana 02.01.2014. godine,** u svojstvu predsjednika Komisije za popis roba i vrijednosnica i stanja u vanbilansnoj evidenciji, u namjeri da prikrije izvršenje naprijed opisanih radnji, obmanuo ostale članove Komisije i druge zaposlenike Direkcije Zenica, tako što je prikazao lažno stanje vrijednosnica u Centralnom skladištu Direkcije Zenica, na način da, kada je trebalo biti izvršen popis robe i vrijednosnica u skladištu C428, svjesno nije sačinio propisane popisne liste i iste nije popunio, pa je uz Izvještaj o popisu umjesto popisnih listi, dostavio lažne tabele iz „excell“ programa, koje je neovlaštenim pristupom SAP aplikaciji sam kreirao i u kojima je unio lažno stanje vrijednosnica u skladištu C428, a koje je prema istim tabelama fiktivno bilo uredno, te na taj način prikrivio stvarni manjak u skladištu C428, koji je prouzrokovao naprijed opisanim radnjama,

pa je naprijed navedenim radnjama, svjesno doveo i održavao u zabludi Upravu „BH Telecom“ d.d. Sarajevo-Direkcija Zenica, u pogledu stanja stvarnog zaduženja vrijednosnica i duga „Trafik“ d.o.o. Kakanj i time naveo Upravu D.D. „BH Telecom“ Sarajevo, Direkcija Zenica, da na štetu svoje imovine ne poduzme mjere radi obustave daljeg zaduženja vrijednosnica i naplate duga „Trafik“ d.o.o. Kakanj, čime je pribavio protivpravnu imovinsku korist pravnoj osobi „Trafik“ d.o.o. Kakanj i istovremeno prouzrokovao imovinsku štetu Dioničkom društvu „BH Telecom“ Sarajevo u iznosu od 1.228.053,80 KM,

## **II Žunić Mugdin i Dilaver Vernes skupa,**

U vremenskom periodu od 31.12.2013. godine do dana 31.01.2014. godine, u Zenici, u svojstvu odgovornih osoba, i to: Žunić Mugdin, radeći na poslovima Saradnika za distribuciju i promociju, u Službi za prodaju, Sektora za prodaju i podršku u DD BH Telecom Sarajevo, Direkcija Zenica, a koristeći svoja ovlaštenja u svojstvu predsjednika Komisije za popis roba i vrijednosnica i stanja u vanbilansnoj evidenciji, a Dilaver Vernes, radeći na poslovima skladištara u istoj Službi, zajednički i dogovorno, u namjeri da prikriju izvršenje krivičnog djela počinjenog od strane Žunić Mugdina iz tačke I optužnice, neovlašteno izmijenili računalne podatke o stanju zaliha na skladištu C428 „BH Telecom“ d.d. Sarajevo-Direkcija Zenica i skladištima distributera, s ciljem da se isti podaci upotrijebe kao pravi, tako što su,

Dilaver Vernes, dana 31.12.2013. godine u SAP sistemu za elektronsku obradu podataka izvršio fiktivne transakcije, tj. storniranje isporuke vrijednosnica iz skladišta C428

prema distributeru „.....“ d.o.o. Gradačac, u količini od 6.000 komada vrijednosnica 5-00023 Ultra kartica za punjenje u vrijednosti od 30.000. KM i 15.000 komada vrijednosnica 5-00480 Ultra start paket u vrijednosti od 75.000. KM, ukupno 21.000 komada, iako su znali da je isti distributer navedenog dana kupio vrijednosnice od Direkcije Zenica u navedenoj količini i iste uredno platio u iznosu od 105.000 KM, a da iste nije preuzeo iz skladišta C428, da bi potom izvršili fiktivan povrat iste te količine vrijednosnica sa skladišta distributera „Trafik“ d.o.o. Kakanj na skladište C428, nakon čega je Žunić Mugdin, prvi radni dan iza Nove 2014. godine, za istu robu ponovo zadužio distributera „.....“ d.o.o. Gradačac, te istima robu i izdao,

da bi potom Žunić Mugdin, koristeći korisnički račun i pristupnu šifru zaposlenice S.M., izlistao popisne liste za skladište C428 i skladišta distributera, te isti korisnički račun i šifru zloupotrijebio na način da nije računarski „zaključao“ stanje u skladištu, kako bi sebi omogućio da izvrši fiktivne transakcije vrijednosnica u SAP sistemu za elektronsku obradu podataka, pa je istog dana 31.12.2013. godine, u aplikaciji SAP (oznaka skladišta W048) izvršio fiktivni povrat robe, tj. vrijednosnica sa skladišta distributera „Trafik“ d.o.o. Kakanj na skladište Direkcije Zenica C428 i to: 160.000 komada Ultra kartica za punjenje od 5 KM u ukupnoj vrijednosti 800.000,00 KM, 14.000 komada Ultra kartica za punjenje od 5 KM u ukupnoj vrijednosti 70.000,00 KM, 18.820 komada Ultra kartica za punjenje od 5 KM u ukupnoj vrijednosti 94.100,00 KM, 17 komada Ultra kartica za punjenje od 10 KM u ukupnoj vrijednosti 170,00 KM i 45 komada Ultra start paketa od 5 KM u ukupnoj vrijednosti od 225,00 KM, odnosno ukupno 964.495,00 KM, a nakon toga, izvršio fiktivno zaduženje drugih distributera; i to: „.....“ Tr. kiosk Tešanj, STR „.....“, „.....“ d.o.o. Jelah i „.....“ str. Olovo, i to za 33.000 komada Ultra kartica od 5 KM ukupne vrijednosti 165.000,00 KM, što čini ukupno 1.129.495,00 fiktivnih transakcija, sve s ciljem da se takvi podaci upotrijebe kao pravi.

### III Dilaver Vernes, sam

U vremenskom periodu od druge polovine 2011. godine do 31.01.2014. godine u Zenici, u svojstvu odgovorne osobe, radeći na poslovima Skladištara u Službi za prodaju Sektora za prodaju i podršku u Dioničkom društvu „BH Telecom“ Sarajevo, Direkcija Zenica, kao materijalno odgovorna osoba i računopologač skladišta vrijednosnica Direkcije Zenica „C428, svjesnim kršenjem odredaba člana 7. tačka 5. Uputstva o distribuciji vrijednosnica i roba posrednicima broj: WIG 7-20/06-02, izdanje 2. od 04.02.2011. godine, i broj: WIG 7-20/06-02, izdanje 3. od 01.11.2013. godine, te odredbama člana 131c. Sistematizacije poslova i radnih mjesta u d.d. BH Telecom Sarajevo, koja je sastavni dio Odluke o izmjenama i dopunama Odluke o Sistematizaciji poslova i radnih mjesta u d.d. „BH Telecom“ Sarajevo broj: 01-1-7-1.-21479-3/13 od 09.09.2013. godine, u vezi sa Odlukom o Sistematizaciji poslova i radnih mjesta u d.d. „BH Telecom“ Sarajevo broj: 01-10-1.-23182/10 od 13.12.2010. godine, očito nesavjesno postupio u vršenju svoje dužnosti tako što je propustio da u okviru svojih redovnih radnih zadataka i obaveza, poduzme radnje koje je bio dužan poduzeti, a koje se odnose prvenstveno na propisno primanje vrijednosnica na skladište, čuvanje i izdavanje vrijednosnica, na način da nije vršio propisno izdavanje vrijednosnica iz skladišta „C428“ koje je dužio, te nije vodio brigu o zalihama vrijednosnica na skladištu i nije na propisan način kontrolisao u poslovnim knjigama da li su evidentirani svi ulazi i izlazi vrijednosnica iz skladišta, pa je zbog takvog njegovog propuštanja dužnih radnji i svojih obaveza nastupila imovinska šteta za BH Telecom d.d Sarajevo u iznosu od 1.228.053,80 KM.

### IV. Maglić Alma, sama

1. U vremenskom periodu od druge polovine 2011. godine do kraja **2013. godine** u Zenici, u svojstvu odgovorne osobe, obavljajući dužnost Šefa Službe za prodaju u Sektoru za prodaju i podršku u DD BH Telecom Sarajevo, Direkcija Zenica, svjesnim kršenjem odredaba člana 119. Sistematizacije poslova i radnih mjesta u d.d. BH Telecom Sarajevo, koja je sastavni dio Odluke o izmjenama i dopunama Odluke o Sistematizaciji poslova i radnih mjesta u d.d. „BH Telecom“ Sarajevo broj: 01-1-7-1.-21479-3/13 od 09.09.2013. godine, u vezi sa Odlukom o Sistematizaciji poslova i radnih mjesta u d.d. „BH Telecom“ Sarajevo broj: 01-10-1.-23182/10 od 13.12.2010. godine, i propuštanjem dužnosti nadzora, očito nesavjesno postupila u vršenju svoje dužnosti, na način da je:

- propustila vršiti nadzor i kontrolu nad radom Službe za prodaju, tj. propustila poduzeti mjere u organizaciji poslova distribucije vrijednosnica BH Telecoma Direkcije Zenica, iz magacina C428 (ULTRA kartice za punjenje/start pakete) u skladu sa osnovnim obavezama i dužnostima iz opisa poslova vezanih za realizaciju Ugovora o posredovanju u prodaji vrijednosnica za 2011., 2012. i 2013. godinu, zaključenih između DD BH Telecom Sarajevo i posrednika „Trafik“ d.o.o. Kakanj, pa je, iako je znala da je da je u 2012. godini prenesen dug distributera Trafik d.o.o., po osnovu prometa vrijednosnica iz 2011. godine u iznosu od 301.088,00 KM, koji je već tada prelazio vrijednost bankarske garancije, u iznosu od 100.000 KM, a u 2013. godini, prenesen dug po osnovu prometa vrijednosnica iz 2012. godine u iznosu od 498.374,40 KM, zbog čega je trebala i morala vršiti stalni i pojačan nadzor i kontrolu distribucije vrijednosnica sa tim distributerom, to propustila učiniti, pa je dopustila da Žunić Mugdin vrši izdavanje vrijednosnica iz skladišta, iako je znala da to nije u opisu njegovog radnog mjesta, nego da je za to zadužen skladištar,

te što je propustila, prilikom imenovanja G. A. za Šefa Odjeljenja za distribuciju i promociju u okviru Službe za prodaju Direkcije Zenica u septembru 2013. godine, organizovati primopredaju, odnosno popis skladišta vrijednosnica „C428“ niti je primopredaju naredila ni zahtijevala, te propustila da vrši analizu poslova distribucije vrijednosnica i provjeru izvještaja o prodaji distributera, pa je na tako neprovjerenim i nepotpunim podacima i izvještajima temeljila svoje analize i izvještaje o poslovanju Službe za prodaju kojom je rukovodila i takve netačne i nepotpune izvještaje predavala Službi za ekonomsko-finansijske poslove, radi sačinjavanja mjesečnih i godišnjih izvještaja o poslovanju Direkcije Zenica i BH Telecom d.d. Sarajevo, pa je zbog takvog njenog očito nesavjesnog postupanja u vršenju dužnosti, nastupila imovinska šteta za „BH Telecom“ d.d. Sarajevo u iznosu od 1.228.053,80KM.

2. Dana 31.12.2013. godine, u Zenici, u svojstvu odgovorne osobe, obavljajući dužnost Šefa Službe za prodaju u Sektoru za prodaju i podršku u DD BH Telecom Sarajevo, Direkcija Zenica, u namjeri pribavljanja imovinske koristi za „Trafik“ d.o.o. Kakanj, prekoračenjem granica svog službenog ovlaštenja, a s ciljem prikrivanja izvršenja krivičnog djela iz tačke I. optužnice počinjenog od strane Žunić Mugdina, kome je bila nadređena, znajući da je na navedeni dan ukupan dug „Trafik“ d.o.o. Kakanj, iznosio 1.385.253,80 KM,

postupala suprotno odredbi člana 119. Sistematizacije poslova i radnih mjesta u d.d. BH Telecom Sarajevo, koja je sastavni dio Odluke o izmjenama i dopunama Odluke o Sistematizaciji poslova i radnih mjesta u d.d. „BH Telecom“ Sarajevo broj: 01-1-7-1.-21479-3/13 od 09.09.2013. godine, u vezi sa Odlukom o Sistematizaciji poslova i radnih mjesta u d.d. „BH Telecom“ Sarajevo broj: 01-10-1.-23182/10 od 13.12.2010. godine, te suprotno članu 73. stav 1. tačka u) u vezi sa članom 112. Statuta DD BH Telecom Sarajevo broj 00.1-2.1.-13898-8/10 od 29.09.2010. godine, tako što je, svjesno, bez znanja i ovlaštenja od strane Nadzornog odbora navedenog Društva, samostalno poduzimala radnje na ustupanju duga između „Trafik“ d.o.o. Kakanj i „.....“ d.o.o. Gradačac, a kojim radnjama su izvršene fiktivne transakcije povrata vrijednosnica sa skladišta distributera „Trafik“ d.o.o. Kakanj na skladište C428, a potom sa skladišta C428, na skladište distributera „.....“ d.o.o. Gradačac, za koje radnje ustupanja duga, odnosno cesije nije bila ovlaštena da iste dogovara niti odobrava,



na način, da je u toku sastanka koji je održan u kancelariji Žunić Mugdina povodom navedenog duga „Trafik“ d.o.o. Kakanj, na kojem su osim nje prisustvovali Žunić Mugdin, Dilaver Vernes, G. A. i Šehagić Taib, pa kada je Šehagić Taib rekao da nema novca da plati dug u naprijed navedenom iznosu, Maglić Alma je, znajući da je distributer „.....“ d.o.o. Gradačac, tog dana kupio vrijednosnice od Direkcije Zenica u količini od 6.000 komada vrijednosnica 5-00023 Ultra kartica za punjenje u vrijednosti od 30.000. KM i 15.000 komada vrijednosnica 5-00480 Ultra start paket u vrijednosti od 75.000. KM, ukupno 21.000 komada i da su iste uredno platili u iznosu od 105.000 KM, ali da robu nisu preuzeli iz skladišta C428, odmah zatražila od Dilaver Vernesa i Žunić Mugdina kojima je takođe bila nadređena, da putem računara izvrše fiktivne transakcije tj. storniranje isporuke kupljenih vrijednosnica u navedenoj količini i vrijednosti prema „.....“ d.o.o. Gradačac, a da se potom izvrši i fiktivni povrat istih tih vrijednosnica, u istoj količini i vrijednosti, sa zaliha distributera „Trafik“ d.o.o. Kakanj na skladište „C428“, pa iako ju je Žunić Mugdin upozoravao da to neće promijeniti stanje duga „Trafik“ d.o.o. Kakanj, ista je i dalje insistirala da se izvrše navedene fiktivne transakcije, što su isti i učinili,

pa je naprijed navedenim radnjama svjesno dovela u zabludu Upravu d.d. „BH Telecom“ Sarajevo, Direkcija Zenica u pogledu stanja stvarnog zaduženja vrijednosnica i duga „Trafik“ d.o.o. Kakanj, te pribavila protivpravnu imovinsku korist pravnoj osobi „Trafik“ d.o.o. Kakanj i istovremeno prouzrokovala imovinsku štetu Dioničkom društvu „BH Telecom“ Sarajevo u iznosu od 1.228.053,80 KM,

3. Dana 31.12.2013. godine, u Zenici, u svojstvu odgovorne osobe, obavljajući dužnost Šefa Službe za prodaju u Sektoru za prodaju i podršku u DD BH Telecom Sarajevo, Direkcija Zenica, zloupotrebljavajući odnos podređenosti Žunić Mugdina i Dilaver Vernesa prema njoj, kojima je bila neposredno nadređena, podstrekavala iste na izvršenje krivičnog djela računalno krivotvorenje iz člana 394. stav 1. KZ FBiH, tako što je u kancelariji Žunić Mugdina, zatražila od istih da neovlašteno izmijene računalne podatke u SAP sistemu koji imaju vrijednost za pravne odnose, tj. zatražila da putem računara izvrše fiktivne transakcije tj. storniranje isporuke kupljenih vrijednosnica od strane „.....“ d.o.o. Gradačac, u količini i vrijednosti opisane u tački IV tačka 2. optužnice, prema „.....“ d.o.o. Gradačac, što su isti i učinili, na način kako je to i opisano u istoj tački, kao i u tački II. optužnice, a sve s ciljem da se takvi izmijenjeni podaci upotrijebe kao pravi i da se prikrije stvarno stanje prekomjernog zaduženja distributera „Trafik“ d.o.o. Kakanj vrijednosnicama d.d. BH Telecom, Direkcija Zenica,

4. U vremenskom periodu od druge polovine 2011. godine do kraja **2013. godine** u Zenici, u svojstvu odgovorne osobe, obavljajući dužnost Šefa Službe za prodaju u Sektoru za prodaju i podršku u DD BH Telecom Sarajevo, Direkcija Zenica, iako je imala saznanja da je Šehagić Taib, direktor „Trafik“ d.o.o. Kakanj, u istom vremenskom periodu, kontinuirano vršio zaduženja vrijednosnica BH Telecom d.d. Sarajevo iz skladišta C428 Direkcije Zenica u visini koja višestruko premašuje iznos bankovne garancije od 100.000,00 KM, ne vraćajući nastali dug, a s ciljem prikrivanja izvršenja krivičnog djela iz tačke I optužnice počinjenog od strane Žunić Mugdina, kome je bila nadređena, istog nije prijavila nadležnim organima, niti je na bilo koji način svoja saznanja prenijela svojim nadređenim - Upravi D.D. „BH Telecom“ Sarajevo, Direkcija Zenica, a za to krivično djelo se može izreći kazna zatvora 5 godina zatvora ili teža kazna,

### V Šehagić Taib, sam

U vremenskom periodu od druge polovine 2011. godine do kraja **2013. godine** u Zenici, u svojstvu odgovorne osobe, kao vlasnik i direktor pravne osobe Trgovinsko-uslužno društvo „Trafik“ d.o.o. Kakanj, u namjeri pribavljanja protivpravne imovinske koristi za istu pravnu osobu, svjesno postupao protivno odredbama člana 5. tačka 5., 7. i 12. Ugovora o posredovanju u prodaji vrijednosnica broj: 01-2-5-2743/12 od 18.12.2012. godine, i člana 19.

Statuta „Trafik“ d.o.o. Kakanj broj 01/09 od 19.02.2009. godine, na način, da je zaprimao vrijednosnice DD BH Telecom Sarajevo, Direkcija Zenica bez potpisivanja međuskladišnih dokumenata i to u enormnim količinama i vrijednostima, iako je bio svjestan da prethodno nije izmirio obaveze i dugovanje prema DD BH Telecom Sarajevo, Direkcija Zenica, odnosno da nije izvršio uplate po ranijim zaduženjima vrijednosnica „BH Telecoma“ od strane „Trafik“ d.o.o. Kakanj, te kontinuirano vršio zaduženja vrijednosnica „BH Telecoma“ iz skladišta C428 Direkcije Zenica ne vraćajući nastali dug, pa je tako znajući da prima vrijednosnice u visini koja višestruko premašuje iznos bankarske garancije od 100.000,00 KM, ali je ne obazirući se na tu činjenicu, iste primio te protivpravno, istim prometovao i ostvarivao protivpravnu imovinsku korist za navedeno Društvo, te kao odgovorno osoba u pravnoj osobi „Trafik“ d.o.o., propustio svoju obavezu da vrši dužni nadzor nad radom zaposlenika, koji su preuzimali vrijednosnice „BH Telecoma“, bez ovjere i potpisivanja izdatnica za preuzetu robu, a koji nisu vodili evidenciju o zaduženjima istih vrijednosnica iz skladišta C428 Direkcije Zenica, zbog čega je na kraju mjeseca decembra 2013. godine, ukupan dug „Trafik“ d.o.o. Kakanj, dostigao iznos od 1.385.253,80 KM, čime je prouzrokovao imovinsku štetu Dioničkom društvu „BH Telecom“ Sarajevo u iznosu od 1.228.053,80 KM, a istovremeno pribavio protivpravnu imovinsku korist pravnoj osobi „Trafik“ d.o.o. Kakanj u navedenom iznosu.

**Dakle,**

### **Žunić Mugdin**

- pod tačkom I, kao odgovorna osoba, iskorišćavanjem svog službenog ovlaštenja s ciljem pribavljanja protivpravne imovinske koristi za drugog, pribavio protivpravnu imovinsku korist pravnom licu „Trafik“ d.o.o. Kakanj i prouzrokovao imovinsku štetu BH Telecom DD Sarajevo u iznosu od 1.228.053,80 KM,

- pod tačkom II, zajednički i dogovorno sa Dilaver Vernesom, neovlašteno izmijenio računalne podatke koji imaju vrijednost za prave odnose, s ciljem da se isti podaci upotrijebe kao pravi,

### **Dilaver Vernes**

- pod tačkom III, kao odgovorna osoba, povredom internih propisa Dioničkog društva „BH Telecom“ Sarajevo, očito nesavjesno postupio u obavljanju svojih radnih obaveza i dužnosti, zbog čega je nastupila imovinska šteta za Dioničko društvo „BH Telecom“ Sarajevo u iznosu od 1.228.053,80 KM,

- pod tačkom II, zajednički i dogovorno sa Žunić Mugdinom, neovlašteno izmijenio računalne podatke koji imaju vrijednost za prave odnose, s ciljem da se isti podaci upotrijebe kao pravi,

### **Maglić Alma**

- pod tačkom IV-1, kao odgovorna osoba, povredom internih propisa Dioničkog društva „BH Telecom“ Sarajevo, očito nesavjesno postupila u obavljanju svojih radnih obaveza i dužnosti, zbog čega je nastupila imovinska šteta za Dioničko društvo „BH Telecom“ Sarajevo u iznosu od 1.228.053,80 KM,

- pod tačkom IV-2, kao odgovorna osoba, prekoračenjem granica svog službenog ovlaštenja, s ciljem pribavljanja protivpravne imovinske koristi za drugog, pribavila protivpravnu imovinsku korist pravnom licu „Trafik“ d.o.o. Kakanj i istovremeno prouzrokovala imovinsku štetu BH Telecom DD Sarajevo u iznosu od 1.228.053,80 KM,

- pod tačkom IV-3, kao odgovorna osoba, zloupotrebom odnosa podređenosti, podstrekavala svoje podređene na počinjenje krivičnog djela računalno krivotvorenje iz člana 394. stav 1. u vezi sa članom 31. KZ F BiH,

- pod tačkom IV-4, kao odgovorna osoba, nije prijavila krivično djelo za koje je saznala u vršenju svoje dužnosti, a za to krivično djelo se može izreći kazna zatvora 5 godina zatvora ili teža kazna.

### **Šehagić Taib**

- pod tačkom V, kao odgovorna osoba u pravnoj osobi, s ciljem pribavljanja protivpravne imovinske koristi za tu pravnu osobu, prikrivanjem činjenica, neistinito prikazujuću stanje i kretanje sredstava i ishoda poslovanja, pribavio protivpravnu imovinsku korist pravnoj osobi „Trafik“ d.o.o. Kakanj i istovremeno prouzrokovao imovinsku štetu „BH Telecom“ d.d. Sarajevo u iznosu od 1.228.053,80 KM,

### **čime su počinili:**

- Žunić Mugdin, pod tačkom I krivično djelo zloupotreba položaja ili ovlaštenja iz člana 383. stav 3. u vezi sa stavom 1. KZ F BiH, a pod tačkom II krivično djelo računalno krivotvorenje iz člana 394. stav 1. u vezi sa članom 31. KZ F BiH u sticaju, a sve u vezi sa članom 54. Krivičnog zakona FBiH;
- Dilaver Vernes pod tačkom III krivično djelo nesavjestan rad u službi iz člana 387. stav 2. u vezi sa stavom 1. KZ FBiH, a pod tačkom II krivično djelo računalno krivotvorenje iz člana 394. stav 1. u vezi sa članom 31. KZ F BiH u sticaju, a sve u vezi sa članom 54. Krivičnog zakona FBiH;
- Maglić Alma pod tačkom IV-1 počinila krivično djelo nesavjestan rad u službi iz člana 387. stav 2. KZ FBiH, pod tačkom IV-2 krivično djelo zloupotreba položaja ili ovlaštenja iz člana 383. stav 3. u vezi sa stavom 1. KZ F BiH, pod tačkom IV-3 krivično djelo neprijavljanje krivičnog djela ili učinioca iz člana 345. stav 2. u vezi sa stavom 1. KZ F BiH i pod tačkom IV-4 krivično djelo podstrekavanjem računalno krivotvorenje iz člana 394. stav 1. u vezi sa članom 31. KZ F BiH, a u vezi sa članom 32. KZ FBiH, sve u sticaju, u vezi sa članom 54. KZ F BiH.
- Šehagić Taib, pod tačkom V, krivično djelo zloupotreba ovlasti u privrednom poslovanju iz člana 247. stav 2. u vezi sa stavom 1. tačka b) Krivičnog zakona FBiH.